

Pertingkat Kesedaran Urus Pembuangan Pelitup Muka Dengan Betul



Oleh: Farzana Husna Abd Halim

Universiti Sains Islam Malaysia

Diterbitkan pada 11 Julai 2021

Pelitup muka menjadi salah satu keperluan kini dan menerima permintaan yang sangat tinggi sejak pandemik Covid-19 melanda dunia.

Berikutan prosedur operasi standard (SOP) yang dikeluarkan oleh kerajaan, pemakaian pelitup muka menjadi kewajipan ketika berada di tempat awam bagi mengekang penularan wabak ini.

Namun, sikap masyarakat yang kurang prihatin terhadap cara menguruskan pembuangan pelitup muka pakai buang dengan betul mengakibatkan wujudnya jenis sampah baharu dalam kuantiti besar yang turut menyumbang kepada pencemaran alam sekitar.



Gambar hiasan

Menurut Timbalan Menteri Alam Sekitar dan Air, Senator Datuk Dr Ahmad Masrizal Muhammad, kadar pembuangan sisa klinikal meningkat sebanyak 111.94 peratus.

Jumlah itu dijangka akan terus melonjak sehingga 173.25 peratus setiap bulan dalam tempoh 12 bulan akan datang.

Mikrofiber dan polipropilena yang merupakan antara bahan utama dalam pelitup muka boleh memakan masa hampir 450 tahun untuk didegradasikan secara semula jadi.

Pelitup muka yang dibuang merata-rata memberi impak negatif terhadap fungsi tubuh badan manusia.

Ini adalah kerana cecair badan dari rongga mulut dan hidung yang melekat pada pelitup muka berpotensi mengandungi bakteria dan virus aktif yang boleh menjangkiti individu lain melalui medium udara atau sentuhan.

Lebih menyedihkan, hidupan liar dan unggas turut terkesan dengan sikap segelintir masyarakat yang tidak bertanggungjawab ini.

Hal ini dapat dilihat pada kaki seekor burung yang terjerat pada lilitan tali elastik pelitup muka, seterusnya membahayakan nyawa haiwan tersebut.



Gambar hiasan

Terdapat juga monyet spesies macaque yang dilaporkan bermain dengan pelitup muka yang dibuang di tepi jalan di Genting Sempah, Pahang.

Malah, seekor penguin Magellan di Sao Paulo, Brazil ditemukan mati akibat tercekik pelitup muka N95 yang disangkakannya adalah makanan.



Gambar hiasan

Selain itu, pelitup muka yang dibuang atau dialirkan ke laut boleh mengancam keseimbangan ekosistem hidupan akuatik.

Misalnya, hidupan laut seperti ikan lumba-lumba dan penyu akan mati sekiranya tertelan pelitup muka pakai buang yang disalah anggap sebagai makanan mereka.

Hal ini akan menjadi lebih parah apabila kadar kepupusan hidupan laut meningkat dan tidak dapat dibendung lagi.



Gambar hiasan

Oleh itu, kita semua haruslah berganding bahu mengurus pembuangan pelitup muka dengan cara yang betul dan selamat agar kehijauan bumi dan kelestarian alam sentiasa terjaga dan terpelihara.

Perbadanan Pengurusan Sisa Pepejal dan Pembersihan Awam (SWCorp) menasihatkan agar semua pihak mengamalkan beberapa langkah mudah dalam menguruskan pelitup muka pakai buang yang telah digunakan dengan betul dan beretika.

Langkah pertama, cuci tangan terlebih dahulu dengan menggunakan sabun atau cecair pembasmi kuman sebelum menyentuh atau menanggalkan pelitup muka.

Langkah kedua, tanggalkan pelitup muka dengan hanya memegang tali atau gelung telinga pelitup muka tanpa menyentuh permukaan luar dan dalam pelitup muka.

Kemudian, lipat atau gulung bahagian pelitup muka yang terdedah iaitu bahagian luar ke arah dalam dan pastikan diikat dengan tali agar tidak mudah diterbangkan oleh angin serta tidak menjerat mana-mana haiwan.

Seterusnya, balutkan dengan tisu atau kertas dan masukkan ke dalam beg plastik sebelum dibuang ke dalam tong sampah yang berplastik dan bertutup.

Akhir sekali, pastikan tangan dicuci semula dengan sabun atau pensanitasi tangan sebelum meneruskan aktiviti harian.

Apa yang lebih penting, semua pihak perlu menyedari betapa pentingnya menguruskan pembuangan pelitup muka dengan betul demi kesejahteraan sejagat.

Usaha murni dan efektif ini memerlukan sokongan dan kerjasama yang utuh daripada pihak kerajaan, swasta, pertubuhan bukan kerajaan, institusi pengajian tinggi dan seluruh rakyat yang merupakan pemegang taruh kepada alam yang kita diami ini.

Kita berharap agar kebersihan dan keindahan alam sekitar yang terjaga dan terpelihara akan menjadi warisan berharga yang dapat terus dirasakan dan dinikmati oleh generasi akan datang.